



戎事類占卷之十三

豫章李克家嗣宗甫輯

古歙胡文海鵬運甫校

星類七

歲星一曰攝提又曰重華曰應星曰經星曰紀星東方青
帝靈威仰之使蒼龍之神木德之精歲行一次十二年一
周天與太歲相應故謂之歲星歲星主道德在五常為仁
五事為貌仁虧貌失逆春令傷木氣則罰見歲星歲星主
春其日甲乙其辰寅卯其卦震巽其音角其數八其帝太
皞其神勾芒歲星所在其國有福逆之則怒為殃尤甚歲
星主司天下諸侯人君之過主齊吳以東之國又為農官

主五穀所居之宿五穀蕃昌其對爲衝乃有殃歲星所在之國不可伐可以伐人所留之野吉所去之野凶超舍而前爲羸退舍爲縮羸其國有兵不復縮其國有憂其將死國傾敗所去失地所之得地一曰當居不居國人所之國昌已居之而又東西去之國凶不可舉事用兵安靜中度吉出入不當其次必有天祇見其舍也歲星羸縮以其舍命國其所居久其國有德厚五穀豐昌不可伐羸縮失次其國有變不可舉事用兵又曰人主之象也色欲明光潤澤德合同又曰進退如度奸邪息變色亂行主無福赤而角其國昌赤黃而沉其野大穰

元史云歲星八十三年而七周天與日合度者七十有六

九三百九十八日八十八刻而與日一合

石氏云歲星羸而東南見彗星羸東北見覺星縮西南見欖雲如牛縮西北見槍雲如馬槍欖楛彗異狀其殃一也至日行一尺出二十餘日乃入其國凶不可舉事用兵出而易所當之國是受其殃又曰妖星不出三年其下有兵及失地若國君喪

甘氏云歲星羸東南不出三月迺生彗本類星末類彗長二丈羸而東北不出三月迺生天楛本類星末銳長四尺縮而西南不出三月迺生天槍左右銳長數丈縮而西北不出三月迺生天欖本類星末銳長數丈必有破國危君伏死其辜餘殃不盡爲旱凶饑暴疾至不出五年其下有

軍及覆地若國君喪又云金水二星附日而行出入有常
出早為月食出晚為天祲及彗星

歲星在春王色比左角大而青精光立春後滿七十二日
後十八日色黃仲春之時有芒角 在冬相其色精光而
無芒角 在夏休其色青黃無精光 在四季囚其色青
微黑 在秋死其色細小不明此其常也如其常則天下
和平 歲星當王時而有相休囚死色其進舍也有德令
其退舍也有惡令其畱守之舍有逆法有逐臣 當相時
而有王休囚死色者其畱守之舍國凶其進舍也有兵其
退舍也相有逆謀不成 當休時而有王相囚死色當囚
時而有王相休死色者其畱守之舍國有禍喪其進舍也

有兵其退舍也將軍凶 當死時而有囚色大赦 歲星
色赤為兵一曰歲星色白多為兵色青白而不光潤兵獄
竝起 歲星青白如灰主有憂期五月兵獄竝起 歲星
變色而赤芒角其國大旱歲饑有兵 歲星在東方宿中
色宜青而白角為兵 在南方宿中色宜赤而青為憂白
角而怒有兵 在西方宿中色宜白而青有憂赤黑皆為
兵 在北方宿中色宜黑而青有憂赤為兵白角而怒亦
為有兵起 歲星變色若有芒角為誅殺為兵 歲星乍
大乍小其國凶乍明乍暗國憂主辱 歲星忽不見國凶
歲星出如浮而沉其國有土功如沉而浮其野凶浮者
見之沉者伏之 歲星芒角動搖其國凶芒角而怒所居

兵起五穀不登 歲星有芒角赤黃人主以武強若戰歲
星無芒角不勝 歲星芒角指者敗迎角而戰者亦敗
歲星五角芒天子自出將兵 歲星一角外射天子大使
出三角兵出有所誅 歲星七角且芒天子與四方戰期
不出一年 歲星九角且芒天子殺賢臣誅邊將期一年
歲星角且芒皆為天子征伐四方 歲星王時當有芒角
無芒角則主威權在下 歲星超一舍二舍至於三舍侯
王不寧不則地動退一舍二舍至於三舍王者滅亾 歲
星順行列宿者喜也逆行有所陵犯皆為凶災 歲星逆
行其國不可興兵順則兵宜進逆則兵宜退 歲星逆行
當遲而疾失一次以上至二次人主驚走社稷危亾天下

兵起民去其鄉歿者如山 歲星晝見為臣強其地有兵
晝見與日爭光武弱文強大臣謀逆 歲星流國主亾
歲星順行不可逆戰逆行不可向之而戰 歲星舍守列
宿其色白為敗常以春甲乙日候之變色則為災

熒惑一曰赤星又曰罰星曰執法曰天侯南方赤帝赤熒
怒之使朱雀之神火之精也其行無常出則兵起入則兵
散熒惑居東方為懸息西方為天理南方為熒惑或進退
無恒躁急促疾故曰熒惑其在五常為禮五事為視禮虧
視失逆夏令傷火氣則罰見熒惑熒惑主夏其日丙丁其
辰巳午其卦離其音徵其數七其帝炎帝其神祝融熒惑
主歿喪主司天下羣臣之過惡驕奢亾亂妖孽主歲成敗

五事類 卷之十三 四
察過失以譴告人王者也主楚吳越以南諸國主憂患愆
尤禍福之所由生其國有道則疾行而東無道則留而降
罰為賊為疾為喪為饑為兵所居之國受殃環繞勾已芒
角動搖變色乍前乍後乍左乍右其殃彌甚周旋止息則
為死喪寇亂其野亾地熒惑失行而速兵聚其下順之戰
勝又曰熒惑不動兵不戰有誅戮又曰熒惑為天子之理
內則理政外則理兵又曰熒惑逆行一舍二舍為不祥居
之三月國有殃五月受兵七月國半亾地九月地大半亾
因與俱入國絕祀居之殃還至雖大當小久而至當小反
大若芒角動搖環繞之及乍前乍後左右殃益大與他星
關光相逮為害不相逮不為害其行東南西北疾也用戰

順之勝逆之敗

元史云熒惑七十九年而四十二周天與日合度者三十
七凡七百七十九日九十二刻又百分刻之九十分而與
日一合

熒惑在夏曰王色比心大星而大赤精光仲夏有芒角

在春曰相其色精光無芒角 在季夏曰休其色赤黃無

精光 在秋曰囚其色青白不明 在冬曰死其色黃黑

細而不明此其常也色如其常則天下和平 當王時而

有相休囚死色其留守之舍不可舉事用兵其進舍也其

國不祥其退舍也其國有旱 當相時而有王休囚死色

其留守之舍其國起兵其進舍也有蝗其退舍也赤地干

里 當休時而有相色其邦亂臣不從令有王色其國受殃有囚色有小兵有灰色盜賊橫行廟堂有火其畱守之舍受殃 當囚時而有王色大臣憂有相色臣下毀傷有休色使者道踣有灰色丁壯從軍其進舍也有兵其退舍也有妖言其畱守之舍道路不通 當死時而有王色宗廟不享有相色大臣攝政有休色宗廟火災有囚色丁壯多死於兵其畱守之舍其下有兵其進舍也多風其退舍也流水湯湯 熒惑變色而黑有大水暴兵至 熒惑色赤黃發疾黑青發難黃若赤一歲內發白色期二年青色期三年黑色期四年至五年以星行尺寸深淺為期應熒惑色蒼細小而無精明名曰進賊讒臣入國不有亾君

必為亂國 熒惑無光先起兵者敗 熒惑赤芒南方國利青芒東方國利黑芒北方國利黃色中國利色黑而芒所居之野有殃 熒惑色大赤而芒不出三年兵喪竝起色青角其國有兵憂 熒惑色青有大兵旱色變正赤其秋有兵 熒惑色赤而芒兵在外大戰無兵兵起 熒惑赤大燦然而芒其地有兵大而赤角有兵出攻戰客利 熒惑有芒角以戰皆不利隨其所指而擊破軍殺將 熒惑出色赤怒逆行成勾已戰凶有圍軍勾已有芒角如鋒刃人主出宮下殿 熒惑始出大而入益小者其國不利 熒惑晝見臣謀王所在分兵起大旱水竭 兩軍相當有雲獨掩熒惑有覆軍死將 熒惑出東方反行而西有

小星擊之卽去其所宿之國受兵 熒惑疾行而東命曰
狡狡者止其相死疾行而西命曰滑滑者起其將死疾行
而南命曰讒讒人興疾行而北命曰賊賊乃作 熒惑從
北入南曰持不出三年其國有喪兵起南方持謂持水入
火 熒惑從南失行而北有兵罷天下旱是謂以火入
水 熒惑出列宿之南爲孽出列宿之北復入爲羸逆爲
縮如是者其下必有伏尸積骨 熒惑春夏失道南行疾
爲旱兵在陽國秋冬失道北行疾爲火入水必有破軍殺
將 熒惑所在之國不秋起兵若畱守之必有殃禍 熒
惑所止三月以上國憂一曰大將死五月破軍亾地七月
其下地半亾居九月地全亾 熒惑已去而復還守之其

殃尤甚從陰之陽亾地三百里從陽之陰亾地二百里從
前之後亾地二百里從後之前亾地三百里 熒惑以庚
辛日畱天下有大兵 熒惑出東方若西方遲畱者其國
不利畱一月以上爲饑爲兵 熒惑變色失行所畱者亾
所抵者兵往來疾期九十日遲者期不過三年 熒惑行
二十八宿正乘其宿星有軍在外畱之三日戰敗大將死
熒惑舍守列宿其色黑爲敗常以夏丙丁日候之變色
則爲災

填星一曰地候中央含樞紐之使勾陳之神土之精也填
星常晨出東方夕伏西方其行二十八宿而一周天歲填
一宿故曰填星在五常爲信五事爲思仁義禮智以信爲

本貌言視聽以思為主故四星皆失填星乃爲之動其歲
侯王不寧縮有軍不復填星主四季其日戊巳其辰丑未
辰戌其卦艮坤其音宮其數五其帝黃帝其神后土女主
之象所在國有福不可伐主聚衆主土功主正紀綱主周
梁主太常主司天下女主之過填星正則女主正邪則女
主邪一曰填星天子之星也天子失信則填星大動又曰
填星所居國吉未當居而居之若已去而復還居之國得
土不乃得女子當居不居既已居之又東西去之國失土
不乃失女子不有土事若女之憂居宿久國福厚易福薄
當居不居爲失填其下國可伐衝者不可伐既已居之又
東西去之其國凶不可舉事用兵失次而上一舍三舍有

王命不成不乃大水失次而下二舍有后惑其歲不復不
乃天裂若地動

元史云填星五十九年而二周天與日合度者五十七凡
三百七十八日九刻又百分刻之一十六分而與日一合
填星在四季之時曰王其色正黃比北極中央大星而精
明有芒角 在夏曰相其色黃大而精明無芒角 在秋
曰休其色黃白無精明 在冬曰囚其色黃黑不明 在
春曰死其色青白細小而不明此其常也如其常則天下
和平 當王時而有相休囚死色其畱守之舍有厚德其
進舍也其國得土其退舍也失土 當相時而有王休囚
死色其畱守之舍其國女主微其進舍退舍皆爲土功憂

事 當休時而有王相凶死色其畱守之舍國人流亾進
 舍退舍皆有殃 當凶時而有王相休死色其畱守之舍
 及進舍其國嗣子憂退舍有喪 當死時而有王相休囚
 色其畱守之舍國有凶殃其進舍也地動若有蛇怪其退
 舍也人多流亾 填星色赤而潤澤不出其年兵起 填
 星赤而芒角有兵喪凡填星色赤為最惡 填星赤而角
 期九十日兵起赤而芒有兵火 填星色青白不出五月
 其國兵起又曰青多為兵白多為獄青白等兵獄俱起
 填星之相也從立夏至夏至其色當赤而小精明無芒角
 及季夏之時比北極中央大星赤黃而光明有芒角季秋
 之時色當比奎大星黃白而光明有芒季冬之時色當比

左角青黃而光明有芒季春之時色當比參左肩黃白而
 光明有芒填星在四方宿中如其方色吉 填星三黃芒
 而角土功興 填星赤黑芒兵起期三月 填星九芒大
 水不則天裂若地動 填星三黑芒其國亾 填星七角
 俱芒女主專政妄殺 填星出角為旱若失色五角則有
 兵戰 填星逆行其國凶逆行一舍為水民去其邑逆行
 二舍有兵亾地逆行三舍王者死 填星至其宿不居即
 去之其國無道可伐 填星行列舍或居其北往來不安
 其國不可興土功不可舉事用兵 填星出北方宿中其
 國不利用兵出東方宿中所出之國兵強出南方宿中其
 下用兵者亾地出西方宿中其國兵起 填星光明盛大

其國大昌微小其國受殃 填星大如狼星而色黃天下
之兵雖合其國不凶 填星變色失行於戊巳之日及辰
戌丑未之月或寅卯之月皆為大凶 填星晝見臣謀君
女主憂上相死 填星芒角有土功聚眾事 填星出彗
所居國受兵凶地 填星舍守列宿色青為敗常以四季
月戊巳日候之變色則為災

太白一曰殷星又曰太正曰營星曰明星曰觀星曰大威
曰太皞曰眾星曰相星曰大囂曰大爽曰序星晨見東方
曰啓明夕見西方曰長庚西方白帝白招矩之使白虎之
神金之精也大而色白故曰太白在五帝為義五事為言
義虧言失逆秋令傷金氣則罰見太白太白上公之號大

將軍之象太白進退以候兵高卑遲速靜躁見伏皆象之
吉主刑殺主秦雍河華蜀漢以西之國其日庚辛其辰申
酉其卦乾兌其音商其數九其帝少昊其神蓐收出以辰
戌入以丑未其出入也必以風雨太白金主威王斷割殺伐
故用兵必占之

元史云太白常與日相近一年一周天八年而五合於日
退合者亦五凡五百八十三日九十刻又百分刻之二十
六分而與日順逆兩合

太白兵象也出而高用兵深吉淺凶埤淺吉深凶行疾用
兵疾吉遲凶行遲用兵遲吉疾凶角敢戰吉不敢戰凶擊
角所指吉逆之凶進退左右用兵進退左右吉靜凶圍以

靜用兵靜吉趨凶出則兵出入則兵入象太白吉反之凶赤角戰

日方南太白居其南日方北太白居其北為嬴侯王不寧用兵進吉退凶日方北太白居其南日方南太白居其北為縮侯王有憂用兵退吉進凶當出不出當入不入為失舍不有破軍必有死王亡國一日天下偃兵野有兵者所當之國大凶當出不出未當入而入天下偃兵兵在外未當出而出當入而不入天下起兵所至破國未當出而出未當入而入天下舉兵所當之國亡當期而出其國昌出東為東方入為北方出西為西方入為南方所居久其國利易其鄉凶入七日復出將軍戰死

入十日復出相死之入又復出人君惡之巳出三日而復微入三日迺復盛出是為奕而伏其下國有軍其眾敗將北巳入三日又復微出三日乃復盛入其下國有憂師雖眾敵食其糧用其兵虜其帥出西方失其行夷狄敗出東方失其行中國敗太白出蚤為月食晚為天矢及彗星將發於亾道之國太白出而留桑榆間病其下國上而疾未盡期日過參天病其對國凡太白所出所直之辰其國為得位得位者戰勝所直之辰順其色而角者勝其色害者敗太白白比狼赤比心黃比參右肩青比參左肩黑比奎大星色勝位行勝色行得盡勝之

太白在秋曰王其色比狼精明而有光於仲秋之時有芒角 在四季曰相其色精明而無芒角 在冬曰休其色精明而無光 在春曰囚其色青黃而不明 在夏曰死其色赤黑細小而不明此其常也如其常則天下和平 當王時而有相色主弱將強權勢從橫天下有兵有休色 臣有謀王者有囚色所任官者囚有死色大將野死其留守之舍兵起其進舍也其下兵歸之其退舍也兵弱不用 當相時而有王色主弱將強有休色將不用命有囚色 將謀不成有死色將死其留守之舍有兵其進舍也是謂 趣兵其退舍也兵出不行 當休時而有王色其野多賊 有相色兵起民亂有囚色死人從橫有死色軍死於野其

留守之舍有逐將其進舍也 武吏從橫其退舍也 文吏弄權 當囚時而有王色其分國有叛將有相色下犯其上 有休色其野多暴兵有死色有妖言言不祥其留守之舍 不可舉事用兵其進舍也 歲多霜雹其退舍也 冬暖不藏 當死時而有王色流水湯湯有相色野火煌煌有休色 錢幣不行有囚色國多狼虎其留守之舍野獸食人其進舍也 白刃搶搶其退舍也 兵不成行 太白主西雖其體大而色白光明而潤澤所在之分兵強國昌體小而昧軍敗國亾 太白出東方色黃而明出西方高而色白此其常也 太白圓大怒而色赤天下有兵盛而不戰赤而芒角乃戰 太白色猛赤次白而蒼悴而不光是謂失色其

所在國雖得地擊之必克 太白色黃黑軍在外者宜罷
之 太白始出色赤有兵主人勝 太白色蒼白而靜天
下厭兵 太白色黑而大青芒角陰國大勝戎兵乃來風
災數起國多賊盜有大獄大兵 太白色黑秋破師 太
白色白而無角以戰不勝 太白色青而暗小國有大憂
太白色赤而怒兵起國多火災 太白色赤者武也利
以戰色白者文也不利以戰 太白白圓不可戰白角有
喪赤角有兵戰 太白光明見影其國戰勝 太白細小
不明天下盜賊多而不發覺所居國尤甚 太白芒炎然
而上大兵起炎然而下則有天狗下於其野有流血 太
白見一芒兵起不用見二芒有戰見三芒天下兵起四芒

諸侯死於境五芒天下更制十芒皆鈎其國不戰而受地
太白芒出長而銳大利攻戰順芒所指擊之勝 太白
赤而角將戰勝無角戰不勝 太白所在之鄉芒日增長
如行過維此威武之氣也不可備 太白五角有立將
六角有取國七角成王四角有赦三角而動有反城胡兵
起 太白過宿角長取地長角短取地短角外指得地內
指失地期一年 太白芒角動搖盜賊羣起兵旱竝作
太白初出大而後小其國兵弱先勝而後亾初出小而後
大其國兵強先敗而後成 太白出而大甲兵煌煌旌旗
相望太白出而小有城不能守有兵不能戰 太白出而
赤圓大而光期不出九十日兵大起 太白出而小後大

在東方陽國兵起在西方陰國兵起 太白未當出而出
東方名曰重華吏虐民擾不得耕織 太白未當下而下
東方名曰少歲其歲饑鬼神不享 太白未當出而出西
方名曰長強有聚卒兵起 太白未當下而下西方名曰
白消有喪吏民帶劔歿者不葬 太白不當出而出主躁
臣熾軍破國亾 太白出西方順行至四正西方之國吉
出東方逆行至四正東方之國吉四正午也出西則從酉
至午止出東則從卯至午止不得過午也過午則爲經天
凶 太白出東方以辰巳爲極逆行不至巳而返陽國強
陰國戰不勝過巳不及午陽國霸天下及午天下聽命於
陽國出西方以申未爲極順行不至未而返陰國強陽國

戰不勝過未不及午陰國霸天下及午天下聽命於陰國
太白昏至未丁間大將憂晨至巳丙間小將歿 太白
出南不得過申北不得過酉失行而北過酉名曰返生不
利侯王失行而南過申不利用兵一曰太白失行而南不
有破軍必有屠城北國當之太白失行而北天下兵大起
失行而南一曰有兵兵罷期三年 太白出卯南南國勝
出卯正東東國勝出酉南南國勝出西北北國勝出酉正
西西國勝 太白出巳殺大將出未陽國傷出戌胡兵起
不戰 太白出戌入未是謂犯地刑絕天維其國受兵將
多傷 太白出東方若西方過營室強國興不及營室而
返還入強國敗 太白行失道爲將有奸小失道爲大奸

逆行而失道者尤甚 太白居實有德也居虛無德也
太白出於辰之南鄭得位行不失色黃而赤大而有角勝
行失而蒼小敗 出於辰卯之間宋得位行不失色黃而
赤大而有角勝行失而黑小敗 出於寅之北趙得位行
不失色黃芒而有角勝行失而蒼小敗 出於寅卯之間
衛得位行不失色黃大而有角勝行失而蒼小敗 出午
未之間吳越得位行不失色蒼赤而有角勝行失而黃小
敗 出於申之南楚得位行不失色赤大而有角勝行失
而黑小敗 出於申酉之間秦得位行不失色白大而有
角勝行失而赤小敗 出於戌之北燕得位行不失色黑
大而有角勝行失而黃小敗 出於酉戌之間齊得位行

不失色蒼大而有角勝行失而白小敗 太白始出西南
維在日月之陽陽國之將傷在其陰陽國利出西南維在
日月之陰陰國之將傷在其陽陰國利 太白出東北維
匈奴有兵相攻 太白行疾為武利以戰行遲為文以戰
不利 太白已入而未出不可起兵 太白入東方未出
西方其六十五日為陽六十五日為陰以此時用兵雖勝
有殃 太白入西方未出東方其十五日為陽十五日為
陰以此時用兵戰必敗一曰太白入西方未出東方南方
之國起兵雖戰勝得地後必敗亾地太白入東方未出西
方北方之國起兵雖戰勝得地後必敗亾地 太白不見
若有客軍來挑戰宜應之不可先擊待其先動而應之勝

太白始出東方西方之國不可舉兵始出西方東方之國不可舉兵違之者兵敗國亾 太白晨出東方平旦見辰巳間寇來淡入謹守勿戰去亦勿追 太白出東方爲德舉事用兵左迎之吉出西方爲刑舉事用兵右背之吉 一曰出軍宜背刑向德交戰宜背德向刑 太白以其時出陽四十日不動先起兵者不利又曰在陽國利其以陽時出於陰重利 太白始出西方小而圓澤有光敢戰者吉不敢戰者凶 太白出至其國之日不見其兵弱可擊得其將太白不見三日有亾國喪師 太白入七日而復出將軍戰歿 太白不上下下而雷桑榆間病其下國若出一百六十日不能參天主卑令不行民亂多盜若出未

滿一百六十日而上過參天主尊令行政理無盜一曰過參天病其對國參天者三之一也過參天則在酉戌之間也 太白始出未可擊也色盛未可擊也色衰未可擊也色灰急擊勿失不擊客將爲主人色灰者赤黑也 太白變色而逆行不可戰太白在秋三月出西方色當白不白而逆行凶且有金石之妖若星隕而爲石石之所下寇至其野當祠蓐收及西海之神以穰之吉 太白晝見有兵兵止無兵兵起一曰太白秦星也晝見秦國兵強 太白晝見與日爭明四海兵起一曰強國弱小國強女主昌 太白經天天下革民更主人流亾天子失位刑罰苛而攻戰行則太白經天經天者謂出東方而入西出西而入東

也太白陰星出西則當伏西出東則當伏東過午則經天
經天則天下革命晝見與經天不同晝見謂當晝而見經
天則順行至未或逆行至巳而不伏故昏旦當午而見所
以出東而入西出西而入東也五星木火土為陽星不以
昏旦過午為嫌金水陰星附日而行昏旦而見於午則放
恣甚矣故其殃為大凡經天則必晝見以其去日遠也晝
見則不必經天故各自為占也 太白出而墜地其下山
摧石裂大水枯竭 太白流其國兵敗將歿 太白自暈
天下有赦有兵不出二十日其國失軍 太白出攘氣三
丈大水兵起 太白出攘氣明大風道上無灰塵不出三
月糴貴五倍不出年中有兵 太白出氣長三丈若五六

丈大風雨兵起所指軍民狙驚 太白出彗出西南維中
國受兵亾地 太白出彗出西北維胡狄受兵亾地 太
白舍守列宿色赤為敗常以秋三月庚辛日候之變色則
為災

辰星一曰安調又曰細極曰能星曰鈎星曰司農曰彗星
曰小武曰同農曰鼎星曰小爽北方黑帝叶光紀之使玄
武之神水之精也辰星之出常在四仲出以辰戌入以丑
未二旬而入晨候之東方夕候之西方附日而行其出入
也不違其時故曰辰星辰星宰相之象又為廷尉主刑法
殺伐將戰鬪有軍在野為偏將軍無軍則官主和陰陽在
五常為智五事為聽智虧聽失逆冬令傷水氣則罰見辰

星辰星主冬其日壬癸其辰亥子其帝顓頊其神玄冥其音羽其數六其卦坎主燕趙代國主刑獄險阻之事辰星所在有權智用兵為主失其時則寒暑失節國當大饑辰星出入必以陰雨不則陰風辰星又為夷狄之事及刑法之得失皆於辰星觀之又曰辰星出蚤為月食晚為彗星及天矢一時不出其時不和四時不出天下大饑失其時而出為當寒反溫當溫反寒當出不出是謂擊卒兵大起與他星遇而鬪天下大亂出於房心間地動

元史云辰星其行常與日相近一年一周天四十六年合於日者一百四十五退合亦然凡行一百一十五日八十七刻又百分刻之六十分而與日順逆兩合

辰星在冬曰王色比奎大星青白精明而有光仲冬之時有芒角 在秋曰相其色精明無芒角不搖 在春曰休其色青黃微小無精光 在夏曰囚其色黃黑小而不明

在四季曰死其色青赤小而不明此其常也如其常則天下和平 當王時而有相休囚死色其畱守之舍國不祥其進舍也與五星合天下有謀其退舍也五星及之不可舉事用兵 當相時而有王休囚死色其畱守之舍其國破亡其進舍也與五星合其國有殃其退舍也五星及之不可舉事用兵 當休時而有王相囚死色其畱守之舍其國多死小兒其進舍也與五星合天下有水其退舍也五星及之其國不可舉事用兵 當休時而有王色夏

雨霜雪有相色秋有暴兵有休色流水湯湯有死色暴獄
兵興其畱守之舍五穀不生其進舍也與五星合有德令
其退舍也五星及之不可舉事用兵 當死時而有王相
休囚色其畱守之舍有疫其進舍也與五星合其年穀不
登其退舍也國有兵不成行 辰星色比織女大星為正
青比左角黑比亢此常色也又曰辰星正色春當青黑夏
當赤黑四季當黃黑秋白冬黑則吉其變色也色白而大
兵起 辰星赤圓為兵赤角兵大起黑角憂水有小戰
辰星色黑三芒天下有兵兵止無兵兵起有水災黃角有
爭地 辰星其時宜効不効為失其當効而出也色白為
旱黃為歲熟赤為兵青為疫黑為水 辰星出東方大而

白有兵於外解常在東方其色赤中國勝外國敗出西方
色赤外國勝中國敗天下無兵於外而赤兵起 辰星生
角有小戰 辰星色黃而小出而易處天下之文變而不
善色赤犯我城黃角地之爭 辰星之色春青黃夏赤白
秋青白而歲熟冬黃而不明即變其色其時不昌春不見
大風秋則不實夏不見有六十日之旱月食秋不見有兵
春則不生冬不見陰雨六十日有流邑夏則不長 辰星
舍守列宿色黃為敗常以冬壬癸日候之變色則為災

戎事類占卷之十三終

戎事類占卷之十四

豫章李克家嗣宗甫輯

古歙胡文海鵬運甫校

星類八

妖星者五行之氣五星之變各以其方以為殃災各以其日五色占知何地吉凶其出無道之國失禮之邦為兵為饑水旱灾凶之徵也又曰凡妖星所出形狀不同為妖如一其出不過一年若三年必有破國屠城其君死天下大亂兵士戰死於野積尸從橫餘殃不盡為水旱兵饑疾疫之殃又曰凡妖星出見長大災深期遠短小災淺期近三尺至五尺期百日五尺至一丈期一年一丈至三丈期三

年三丈至五丈期五年五丈至十丈期七年十丈以上期九年審以察之其災必應

客星者非其常有偶見於天此天皇大帝之使以告休咎也一曰客星見無常所或出西或守東日多者事大而禍深日少者事微而禍淺或見而變色芒角必有謀弒之兆其色微小即有陰謀兵亂之事各以星色占之色白者其分野兵起有芒角者其下破軍殺將侵城奪邑

凡客星見其分若留止即以其色占吉凶星大事大星小事小星色黃得地色白有喪色青有憂色黑有死色赤有兵各以五色占之不出三年又曰客星入列宿中外官者各以其所部舍官名為其事所之者為其謀其下之國皆

受其禍以守之舍為其期以五氣相賊者為其使

客星者周伯老子王蓬絮國皇温星皆客星也行諸列舍

十二國分野各在其所臨之邦所守之宿以占吉凶周

伯星大而色煌煌然見其國兵起若有喪天下饑眾庶流

亾去其鄉瑞星中名狀與此同而占異老子星明大色白淳淳然所

出之國為饑為凶為善為惡為喜為怒常出見則兵大起

人主有憂王者以赦除咎則災消王蓬絮狀如粉絮拂

拂然見則其國兵起若有喪白衣之會其邦饑亾又曰王

蓬絮星色青而熒熒然所見之國風雨不節焦旱物不生

五穀不成蝗蟲多國皇星出而大其色黃白望之有芒

角見則兵起國多變若有水饑人主惡之眾庶多疾此與妖星

國皇 温星色白而大狀如風動搖常出四隅出東南天
下有兵將軍戰於野出東北當有千里暴兵出西北亦如
之出西南其國兵喪竝起若有大水人饑又曰温星出東
南爲大將軍負屈不能發者出於東北暴骸三千里出西
北亦然

流星天使也自上而降曰流自下而升曰飛大者曰奔奔
亦流星也星大者使大星小者使小聲隆隆者怒之象也
行疾者期速行遲者期遲大而無光者衆人之事小而
光者貴人之事大而光者其人貴且衆也乍明乍滅者賊
不成也前大後小者恐憂也前小後大者喜事也蛇行者
奸事也往疾者往而不反也長者其事長久也短者事疾

也 流星天狗墜下狀如犬奔星色黃有聲其止地類狗
所墜望之如火光炎炎衝天其上銳其下圓如數頃田處
或曰赤星上銳下拖光出如彗或曰星赤其狀赤白有光
下卽爲天狗一曰流星有光見人面墜無音若有足者名
曰天狗其色白其中黃黃如遺火狀主候兵討賊見則四
方相射千里破軍殺將或曰是將鬪人相食所往之鄉有
流血其君失地兵大起國易政戒守禦又曰青赤雲氣結
成犬形名天狗破軍殺將人將相食又曰氣赤如血紛紛
亂落名天狗下食血必有惡戰兩軍大傷凡出軍在城營
中有氣赤如血從外入者亦名天狗下食血大戰流血
流星出紫宮天子使也色赤言兵色白言喪色黃言吉色

青言憂色黑言水出皆以所之分野命其國 流星有芒
或有聲為怒氣色青為憂為饑赤為兵為旱黃為喜為土
功白為兵為刑罰黑為疾疫為水災看休王各以日
辰宿分所屬分野論之 眾星流者萬人不安之象凡眾
星竝流將軍舉兵隨流星所向擊之勝凡見流星赤光入
我營中大凶若在前後此伏兵之氣不可出戰 流星流
而不止者不出半年動眾離散若墜軍營中大凶速退軍
避之一云易將以穰之 流星白為使客大如瓜為近小
行稍有光為遲也又正王日邊方有受王命者 凡圍城
有流星來往過城或墜城營中者敗軍之象 流星從彼
出來吾軍正當有間謀來說吾軍夜半或寅時使至 奔

星所墜其下有兵無風雲有流星見良久間乃入為大風
發屋折木小流星百數四面行者眾庶流移之象 流星
有光其色黃白從天墜有音如炬燦火下地野雉鳴天保
也所墜國安有喜又曰流星墜下四散有聲曰天保防火
災 若小流星色青赤名曰地鴈其所墜者起兵 流星
有光青赤長二三丈名曰天鴈軍中之精華也其國起兵
將軍當從星所之 流星之尾長二三丈暉然有光光白
長竟天者人主之使也色赤者將軍使也王相將軍從星
所之 流星有光尾狀如疋布蒼白色為使赤為兵黑為
灰喪 流星甚大其光照地色青赤流四傍者五穀不登
流星有尾赤兼青者直下落於營湏急遷去 流星犯

日映日而赤色向日而流者天下不安 流星大如月西
流有聲蛇行屈曲光照地兵大起下有戰場 流星大如
三斗器色赤出紫宮凝著天乃北下人主去其宮殿 大
星如斗墜營作聲長數丈者其間大戰殺將急宜移去
凡流星如甕者為發謀起事大如桃者為使事 流星大
如缶其光赤黑有喙者名曰梁星其所墜之鄉有兵君失
地 飛星大如缶若甕後皎然白前卑後高此謂頓頑其
所從者多凶 飛星大如缶若甕後皎然白前卑後高
搖頭乍上乍下此謂降石所下民食不足 飛星大如缶
若甕後皎然白星滅後白者曲環如車輪此謂解銜其國
人相斬為爵祿 飛星大如缶若甕其後皎然白長數丈

星滅後白者化為雲流下名曰大滑所下有流血積骨
飛星大如缶若甕後皎白縵縵然長可十餘丈而委曲名
曰天刑一曰天飾將軍均封疆 流星墮為石有凶國有
死王有大戰破軍殺將 流星墮軍營如驢鳴軍必敗
流星晝墮聲如雨赤白或長三五丈忽然更有小星者軍
必敗 營頭晝有雲如壞山墮軍上所謂營頭之星所墜
其下覆軍流血千里一曰流星晝墮名營頭又曰怪星晝
行名營頭行振大誅也

流星犯歲星其地辱主 流星衝熒惑其下君有福慶若
光映熒惑者鄰國有奸謀宜謹防之 流星犯填星外邦
有奸人入國又曰流星衝填星填星光潤其分野有福又

曰流星犯填星而色赤其分野有兵黑有水 流星犯太白其分野兵弱無兵兵起又曰流星衝太白太白無光其軍師有憂又曰流星潤澤前後有光而銳來穿太白其下若有軍即還

彗五彗也蒼則王侯破天子苦兵赤則賊起強國恣黃則女害權奪后白則將軍逆二年兵大作黑則水江河決賊處處起 彗星世所謂掃星本類星末類彗小者數寸長或竟天見則兵起大水主掃除除舊布新有五色各依五行本精所主彗體無光假日而為光故夕見則東指晨見則西指在日南北皆隨日光而指頓挫其芒或長或短光芒所及則為災又曰其象若竹彗樹木條長短無常其長

大見久災深短小見不久災狹 河圖云歲星之精流為蒼彗熒惑散為赤彗填星散為黃彗太白散為白彗辰星散為黑彗五色之彗各有長短曲折應象

兩軍相對彗星見隨彗所指擊之者勝 彗星行者事小止者事大各以分野占之 彗星昏見其國受兵 彗星

出有叛者兵起其國一曰不出一歲天下大水其邦尤甚

彗星見後曲象旗則王者討伐四方 彗星見敵國兵起得本者勝 彗從中出尾向東天下人民歿上殺下也尾向北天下相殺向南亦然尾向西南三處逆臣動尾向東南人不安尾向西北臣弑君西北者乾位尾向東北胡夏不和四尾相連天下太平君臣有德 彗出兩尾天下

囚徒反 二彗並現天下大亂一年主赦

彗星犯乾不移國災亢旱人民有難一年內應 犯坎不

移兵起一年內應 犯艮不移五穀不收人民不安 犯

震不移民亂五穀無收凶 犯巽不移有陰謀事二百日

內應 犯離不移兵亂旱災一年內應 犯坤不移反逆

之兆一年內應 犯兌不移君王離位一年內應

彗犯角亢至近不移主大風有哭痛聲人民饑一年內應

犯氏房心不移宋國水災兵戈大亂三百日內應 犯

尾箕不移燕國大兵起人民饑荒三百日內應 犯斗牛

女不移吳越兵起人民荒亂水災一年內應 犯虛危不

移蝗蟲災傷人民大亂一年內應 犯室壁不移水災漂

流人民散亂 犯奎婁近不移魯地有兵起人民離凶疾

疫一年內應 犯胃昴畢近不移趙魏有火災妖孽鬼崇

作害饑荒一年內應 犯觜參井近不移晉地大兵起亢

旱饑饉一年內應 犯鬼柳近不移秦地大兵起人民災

三百日內應 犯星張近不移周地有兵人民疾疫一年

內應 犯翼軫近不移楚地有賊大亂三年內應

孛星者惡氣所生為亂兵其所以孛德孛德者亂之象不

明之表又參然孛馬兵之類也故名之曰孛孛之為言猶

有所傷害有所妨蔽或謂之彗星所以除穢而布新也又

曰孛星彗之屬也偏指曰彗芒氣四出曰孛孛者孛孛然

非常惡氣之所生也內不有大亂則外有大兵天下合謀

闇殺不明有所傷害晏子曰君若不政孛星將出彗星何懼乎由是言之災甚於彗

漢京房風角書集星章所載妖星皆以五寅日見於月旁各以五星所生云 天槍生箕宿中天根生尾宿中天荆生心宿中天猿生氏宿中天樓生亢宿中天桓生左角宿中皆歲星之所生也見以甲寅日其星咸有兩青方在其旁 天陰生軫宿中晉若生翼宿中官張生張宿中天惑生七星宿中天雀生柳宿中赤若生鬼宿中蚩尤生井宿中皆熒惑之所生也出在丙寅日有兩赤方在其旁 上天伐從星天樞天翟天沸荆彗皆填星之所生也出在戊寅日有兩黃方在其旁 若星生參宿中帚星生觜宿

中若彗生畢宿中竹彗生昴宿中牆星生胃宿中猿星生婁宿中白藿生奎宿中皆太白之所生也出在庚寅日有兩白方在其旁 天羨生壁宿中天冕生室宿中天杜生危宿中天麻生虛宿中天林生女宿中天高生牛宿中端下生斗宿中皆辰星之所生也出以壬寅日有兩黑方在其旁 已上三十五星卽五行氣所生皆出於月左右方氣之中各以其所生星將出不出日數期候之當其未出之前而見則有水旱兵喪饑亂所指亾國失地王歿破軍殺將

歲星之精流爲天棓天槍天猾天衝國皇反登 一曰天棓一名覺星或曰天格本類星末銳長四丈或出東北方

西方主滅兵主奮爭又曰天棊出其國凶不可舉事用兵
 又曰期三月必有破軍拔城又曰歲星失次進而東北三
 月生天棊長四尺餘主鈇鉞動 二曰天槍主捕制或曰
 攬雲如牛搶雲如馬或曰天槍左右銳長數丈天攬本類
 星末銳長丈其出不過三月必有破國亂軍伏歿其辜殃
 之不盡當為饑旱暴疾 三曰天猾主招亂又曰人主自
 恣逆天暴物則天猾起 四曰天衝狀如人蒼衣赤首不
 動主滅位又曰衝星出臣謀主武卒發又曰天衝抱極泣
 帝前血濁霧下天下寃 五曰國皇或曰機星散為國皇
 星大而赤類南極老人星主滅奸主內寇內難見則兵起
 天下急或云其下起兵兵強又曰外內有兵喪又曰見則

其衝不利東南兵起或云去地二三丈如炬火狀與客星名同而
占狀 六曰反登主夷分皆少陽之精司徒之類青龍七
 宿之域有謀反若恣虐為害主失春政者以出時衝為期
 皆主君徵也

熒惑之精流為析旦蚩尤旗昭明司危天攬 一曰析旦
 或曰昭旦主弱之符又曰析旦橫出參擢百尺為相誅滅
 二曰蚩尤旗或曰旋星散為蚩尤旗或曰蚩尤旗五星
 盈縮之所生也狀類彗而後曲象旗或曰四望無雲獨見
 赤雲蚩尤旗也或曰蚩尤旗如箕可長二丈未有星所見
 之方其下有兵又曰亂國之王眾邪竝積有雲若植萑竹
 長黃上白下名曰蚩尤旗主誅逆國又曰帝將怒則蚩尤

旗出又曰虐王反度則蚩尤旗出或曰本類星而後委曲其象旗旛可長二三丈見則王者旗鼓大行征伐四方兵大起不則國有大喪又曰長星竟天是為蚩尤旗所以去無道建有德國大亂而亾 三曰昭明五星變出於西方名曰昭明金之氣也又曰赤彗分為昭明昭明滅光象如太白七芒故以為起霸之徵或曰機星散為昭明又曰西方有星望之去地可六丈而有光其類太白數動察之中赤是謂西方之野星名曰昭明出則兵大起其出也下有喪出南方則西方之邦失地或曰大而白無角乍上乍下所起國兵多變或曰昭明形如三尺機機上有九彗上向或曰昭明如太白不行王起有德又曰西方有星大而白

有角目下視之名曰昭明金之精出則兵大起若起房心國有喪必有屠城昭明下則為天狗所下者大戰流血 四曰司危又名司怪或曰機星散為司危又曰白彗之氣分為司危司危平以為乖爭之徵或曰司危星大有毛兩角又曰司危星類太白數動察之而赤司危出強國盈主擊強候兵也又曰司危見則主失法期八年豪傑起天子以不義失國有聲之臣行主德也又曰司危見則其下國相殘賊又曰司危星出正西西方之野星去地可六丈大而白類太白一曰見兵起強又曰司危出非其方其下有兵其衝不利 五曰天攬其狀白小數動主殺罰是謂攬星一名斬星天攬主制時又曰天攬見女主用事者其本

為主人或曰天攬彗出西北狀如劍長四五丈或曰如鉤
長四丈又曰天攬出其下相攬為饑為兵赤地千里枯骨
藉藉一曰天攬出其國內亂又曰太陽之精朱鳥七宿之
域有謀反恣虐為害主失夏政

填星之精流為五殘六賊獄漢大賁炤星絀流弗星旬始
擊咎 一曰五殘或曰旋星散為五殘亦曰蒼彗散為五
殘如辰星出角故為毀敗之徵或曰五殘五分一曰一本
而五枝也期九年奸與三九二十七大亂不可禁又曰五
殘者五行之變出於東方五殘木之氣也一曰五鋒又曰
五殘星出正東東方之野星狀類辰星去地可六七丈大
而白或曰大而黃主乖亾亦為備急兵見則主誅政野亂

成或曰東方有星望之去地可六丈大而赤察之中青或
曰星表青氣如暈有毛其類歲星是謂東方之野星名曰
五殘出則兵大起其出也下有喪出北則東方之邦失地
又曰五殘出四蕃虛天子有急兵或曰五殘大而赤數動
察之中青又曰五殘出則兵起 二曰六賊五行之氣出
於南方名曰六賊火之氣也或曰六賊星如彗又曰南方
有星望之可去地六丈赤而數動察之有光其類熒惑是
謂南方之野星名曰六賊出則兵起其國亂其出也下有
喪出東方則南方之邦失地又曰六賊星見出正南南方
之星去地可六丈大而赤數動有光又曰五殘六賊出禍
合天下逆侵關拒 三曰獄漢一曰咸漢或曰權星散為

獄漢又曰咸漢者五行之氣出於北方水之氣也獄漢青
中赤表下有三彗從橫主逐王刺王又曰北方有星望之
可去地六丈大而赤數動察之中青黑其類辰星是謂北
方之野星名曰咸漢出則兵起其下有喪出西方則北方
之邦失地又曰獄漢動諸侯驚出則陰橫又曰五殘六賊
司危咸漢出非其方其下有兵其衝不利 四曰大賁主
暴衝 五曰炤星主滅邦 六曰絀流動天下敖主伏逃
又曰絀流主自理無所逃 七曰彗星在東南本類星末
類彗所當之國實受其殃 八曰旬始或曰樞星散為旬
始或曰五星盈縮之所生也亦曰旬始妖氣又曰旬始蚩
尤也又曰旬始出於北斗旁狀如雄雞其怒青黑象伏鼈

又曰黃彗分為旬始旬始者今起也狀如雄雞土含陽以
文白接精象雞故以為立主之題期十年聖人起代羣猾
橫恣又曰旬始怒雌也主爭兵主亂主招橫又曰旬始照
其下必有滅王五奸爭作暴骨積骸以子續食見則臣亂
兵起諸侯為虐又曰常以戊戌日視五車及天軍天庫中
有奇怪曰旬始狀如鳥有喙而見者則兵大起攻戰當其
首者破歿或曰出則諸侯雄鳴又曰出見北斗聖人受命
天子壽王者有福 九曰擊咎出臣下主一曰臣禁主主
大兵又曰土精斗七星之域以長四方司空之位有謀反
恣虐者占如上

太白之精散為天杵天柎伏靈大敗司奸天狗天殘卒起

一曰天杵主祥羊 二曰天柎主擊殃 三曰伏靈主
 領讒伏靈出天下亂殺人 四曰大敗主鬪衝或曰大敗
 出擊咎謀 五曰司奸主見妖 六曰天狗亦曰五星氣
 合之變出西南金火氣合名曰天狗或曰天狗星有毛旁
 有短彗下如狗形者主徵兵主討賊亦曰天狗流五將鬪
 又曰西北方有星長三丈而出水金氣交名曰天狗亦曰
 西北三星大而白名曰天狗見則大兵起天下饑人相食
 又曰天狗所下之處必有大戰破軍殺將伏尸流血天狗
 食之皆期一年中二年遠三年各以其所下之國以占吉
 凶與流星天狗名
同占狀小異 七曰天殘主貪殘 八曰卒起卒起
 見禍無時諸變有萌臣運柄又曰少陰之精大司馬之類

白虎七宿之域有謀反若恣虐為害主失秋政者期如上
 占禍亦應之

辰星之精散為枉矢破女拂樞滅寶繞廷驚理大奮祀

一曰枉矢或曰填星之變為枉矢又曰機星散為枉矢亦
 曰枉矢五星盈縮之所生也弓弩之象也類大流星色蒼
 黑蛇行望之如有毛目長數匹著天主反萌主射愚又曰
 黑彗分為枉矢枉矢者射是也枉矢見謀反之兵合射所
 誅亦為以亂伐亂又曰人君暴專已則有枉矢動亦曰枉
 矢類流星望之有毛目長可一匹布皎皎著天見則大兵
 起大將出弓弩用期三年又曰枉矢所觸天下之所伐射
 滅之象也又曰物莫直於矢今蛇行不能直而枉者執矢

者亦不正以象執政亂也 二曰破女破女若見君臣皆
誅主勝之符 三曰拂樞拂樞動亂駭擾無調時又曰拂
樞主制時 四曰滅寶滅寶起相得之又曰滅寶主伐之
五曰繞廷繞廷主亂孽 六曰驚理驚理主相署 七
曰大奮祀大奮祀主招邪或曰大奮祀出主安之大陰之
精玄武七宿之域有謀反若恣虐為害主失冬政者期如
上占禍亦應之又曰五精潛潭皆以類逆所犯行失時指
下臣承類者乘而害之皆滅亾之徵也

雜妖星 一曰天鋒彗象矛鋒天下從橫則天鋒星見
二曰燭星狀如太白其出也不行見則不久而滅或曰主
星上有三彗上出所出城邑亂有大盜不成又以五色占

三曰蓬星大如二斗器色白一名王星星狀如夜火之光
多至四五少即一二亦曰蓬星在西南長數丈左右兌出
而易處星見不出三年有亂臣戮死又曰所出大水大旱
五穀不成人相食又曰有星其色黃白方不過三尺名曰
蓬星又曰蓬星狀如粉絮見則天下道術士當有出者布
衣之士貴天下太平五穀成一曰蓬星出北斗諸侯有奪
地以地亾有兵起 與客星王蓬絮占異 四曰長庚如一疋帛著天
見則兵起 五曰四填星出四隅去地六丈餘或曰可四
丈或曰星大而赤去地二丈常以夜半時出星見十月而
兵起皆為兵起其下 六曰地維藏光地維藏光者五行
之氣出於四角之氣也又曰四隅有星望之可去地四

大而赤黃搖動其類填星是謂中央之野星出於四隅名曰地維藏光出東北隅天下大水出東南隅天下大旱出西南隅則有兵起出西北隅則天下亂兵大起或曰出四隅大而赤如月始出見則其下有亂者必有德者昌 七
曰女帛女帛者五星氣合變出東北水木氣合也又曰東北有星長三丈而出名曰女帛見則天下兵起若有大喪又曰東北有三大星出名曰女帛占同上 八曰盜星盜星者五星氣合之變出東南火木氣合也又曰東南有星長三丈而出名曰盜星見則天下有大盜多寇賊又曰東南有三大星出名盜星占同上 九曰積陵乃五星氣合之變出西北金水氣合也又曰西南有星長三丈見則天

下隕霜兵大起五穀不成民饑又曰西南有三大星名曰積陵出則天下穀貴十倍積一作種 十曰端星乃五星氣合之變出與金木水火合於四隅又四隅有星大而赤察之中黃數動長可四丈此土之氣効於四季名曰四隅端星所出兵大起 十一曰昏昌有星出西北氣青赤以環之中赤外青名曰昏昌見則天下兵起國易政先起者昌後起者凶高十丈亂一年高二十丈亂二年高三十丈亂三年 十二曰莘星有星出西北狀如環一名山勤星見則諸侯有失地在西北國 十三曰白星如星非星狀若削爪有勝兵名曰白星出則為男喪 十四曰菟昌西北菟昌之星有赤青環之有殃有青為水此星見則天下

改易 十五曰格澤氣赤如火炎炎中天上下同色東西
絙天若於南北長可四五里此熒惑之變見則兵起其下
伏尸流血期三年與瑞星格 十六曰歸邪色如赭光焰
出如彗非彗如星非星如雲非雲見陰雲中如陽發於陰
之象或曰有兩赤彗上向上有蓋狀如氣下連星或出北
斗傍或光射貫北斗或曰見必有歸國者或曰主兵敵國
滅王復興聖人出 十七曰濛星又曰隧星夜有赤氣如
牙旗長短四面西南最近又曰刀星亂之象也又曰徧天
薄雲四方生赤黃氣長三尺乍見乍沒尋皆消滅又曰刀
星見天下有兵戰鬪流血或曰徧天薄雲四方合有八氣
蒼白色長三尺乍見乍沒

八怪星 一毛頭星一曰彗星又曰掃星形如掃帚色似
白雲如赤土獨尾指處大凶見則不過一年夷狄兵起中
國荒亂又曰白氣穿心上如披頭百物消耗亂兵為害又
曰從起處一道白氣長三五丈如簾不出百日國內兵起
合主喋血 二帶劍星一曰毛一曰懸刀一曰仗刀形如
刀色似白雲如赤土尖鋒指處大凶見則不過一年主兵
奸臣作亂又曰白氣一條穿心斜貫兵起作亂宜先進戰
又曰有一道氣色百日內兵起先動者勝 三銀鎗星一
曰神錐一曰吳鉤形如短鎗色似白雲尖指處大凶主夷
狄來侵盜起天下亂又曰白氣一條穿心直貫兵起四方
擾害天下又曰有氣穿星而過長三五丈形如神鎗不過

六十日兵起侵越疆界 四張弓星一曰射弓一曰破射
形如弓樣如初月色似白雲尖指處大凶見則不過二年
兵起天下大亂又曰氣焰如弓架箭以射兵起民災後終
有功又曰形如弓拽滿起立當心中國兵起以威天下靖
亂定難 五神又星一曰神鎗一曰神戟形如叉色似白
雲尖指處凶見則不過一年國內大亂又曰星焰上出末
開兩了大兵起亂主將乖疑又曰下一道氣色見不過四
十日國內大亂死凶相藉 六拖練星一曰長庚一曰短
帶形如拖練色似白雲尖指處大凶見則不過一年草寇
興兵又曰星垂白氣如練兵革起亂國主凶災又曰從起
處有氣色一道如舒綿不過九十日國亂兵起民逃 七

拋毬星一曰長人頭一曰數月形如圓月色似白雲見則
不過一年天子離宮人民失業又曰旂頭上圓下披見則
兵亂人死如山又曰從起處發一道氣色細微如練長三
二丈號曰拋毬不過五六十日兵大起 八旗鎗星一曰
懸纛一曰擔旗形如旗鎗色似白雲見則一年內兵起國
亂又曰星焰上起斜如擔旗邊兵作亂血戰無休又曰其
氣一道如人肘搶上面氣如遮大旗其星若於夜起從營
寨上見主營中不過三更更有血也此星見者百日内四夷
兵起中國大亂殺人如麻

景星者德星也天暝而見景星暝精明也一名良星亦名
瑞星如半月生於晦朔助月為明或曰星大而中空或曰

黃光焰焰如半月或曰有赤方氣與青方氣相連赤方中有兩黃星青方中有一黃星凡三星合為景星也其狀無常常出於有道之國 星如炎火色黃白起地而上下大上銳曰格澤其見則不種而穫不有土功必有大客 大星在西方光明黃潤曰壽星見則人君壽考 赤星黃光在赤氣中曰祿星見則其國吉昌 星黃色煌煌然其光燭地曰周伯所見之國大昌 與客星周伯占異 星光耀明盛似彗射出曰含譽喜則含譽射又主蠻夷入貢

戎事類占卷之十四終

戎事占類卷之十五

豫章李克家嗣宗甫輯

古歙胡文海鵬運甫校

風類一

風者天之號令順其時則枯者榮榮者實此天令之喜也不順其時則傷人折木毀屋害稼此天令之怒也大抵順時生物者吉非時殺物者凶海體積陰通於地氣氣出成風而赤黑近山風大而沉曠近海風大而昏黑軍聚埃興馬行塵起旋風作於一時暴風起於百里細風及於一方亦自然之理不主休咎風勢動葉其來十里鳴條百里撼木二百里落葉三百里折枝幹四五百里飛沙石千里拔

大木五千里半日半夜五千里一日一夜萬里三日三夜
半天下七日七夜遍天下若衆鳥噪空翻飛羣魚出水跳
躍星動搖日月昏暈雲片片相逐慘白慘黃聚散不常雲
繞日雲脚黃雲行急日光搖太白晨見參宿動燈火焰作
聲皆大風之候

凡候風之法選高迥之地立五丈竿上作木盤盤內畫八
卦十干十二支羅於上下安三足木鳥機關轉運使鳥銜
花搖動卽占之又法用雞羽八兩懸於五丈竿上安營中
以驗所發之方八風遲緩疾速無風處有聲如奔馬炎如
火則爲人氣所聚十人言語吼如雷發凡吉祥之風日色
清明聲氣和緩從八方而來人心悅服凶災之風日色白

濁淒寒昏暗神靈叫怒別五音而定吉凶詳八卦而知善
惡若夫發屋折木者爲怒風以彰愆慝揚沙轉石者爲狂
風以戒縱逸錯雜從橫者爲亂風爲任奸遠賢啾唧慘怛
者爲病風爲疾疫大喪觸塵蓬勃者爲殺風宜審災變扶
搖羊角者爲飄風當察奸凶凜冽而砭人肌骨者爲殺風
刑罰暴急猝起而南北不定者爲驚風上下不寧大風而
黃霧滾滾白日沉沉者人君昏悖政理乖違大風而叱叱
諂諛蒙蒙陰曠者大兵將至預防戰攻

京房易傳曰潜龍勿用衆逆同志至德迺潜厥異風其風
也行不鮮物不長雨小而傷 政悖德隱茲謂亂厥風先
風不雨大風暴起發屋折木 守義不進茲謂耄厥風與

雲俱起折五穀莖 臣易上政茲謂不順厥風大火焮發屋
賦歛不理茲謂禍厥風絕經紀止卽温温卽蟲 侯專
封茲謂不統厥風疾而樹不搖穀不成 辟不思道利茲
謂無澤厥風不搖木旱無雲傷禾 公常於利茲謂亂厥
風微而温生蟲蝗害五穀 棄正作淫茲謂惑厥風温螟
蟲起害有益之物 侯不朝茲謂叛厥風無恒地變赤而
殺人

凡風動皆不安之象如在山川空穴間風所出處不可占
若城營之內戰陣之所風勢異常日光昏濁發屋撼樹揚
沙捲塵乃可占之 無兵之時風雲相交爲雨用兵之時
龍虎相交爲戰大交大戰風爲主雲爲客風勝雲主人勝

雲勝風客兵勝 兩軍相當陳師原野未知勝負以先舉
入他人地者爲客後舉自居其地者爲主常以日納音占
客以時及風起之方占主人

疾風勃起拔木發屋曰耗風君德昏蔽兵火興災 暴風
怒謔雲氣昏暈曰惡風國政昏亂急兵猝起 風鼓塵翳
連日不止曰邪風國有大憂兵火災傷 急風陰晦連日
不散曰寵風女謁煽禍人怨兵起 旋風損物歛舉上冲
曰逆風在朝防失土宇在營防敵冲襲 旋風攬土去而
又來曰冤風下有冤枉伏尸告變 風聲哀鳴悲切連日
曰哭風火災傷人兵受其敗 迅風作陣急緩不均曰敗
風敵兵大敗我收奇功 風吹雨血地水赤流曰叛風奸

邪謀逆兵起人災 風熱生蟲食苗之葉啗人之衣曰殘
風淫昏亂政兵起大饑 風疾吹而木不動搖五穀茂而
不實曰流風臣專子奪民受其殃 風氣結聚昏黑籠蔽
曰黑風君失其政夷狄侵擾 風氣結陣紅赤橫吹曰紅
風賢士災憂奸邪兵起 風氣急吹中有火光曰神風寇
賊起兵殺害忠良 風氣急吹行人無迹曰鬼風兵有異
謀將受凶敗 暴風急吹尖削刺人曰賊風賊兵聚勢暗
行冲襲 風寒逼人如水澆潑曰水風政濫兵起上下同
災 惡風逆吹發屋損物曰不順風臣易上政民流兵起
木不動搖旱風傷禾曰不澤風私利蔽公民災國亂
旋風入營吹倒兵仗曰昭報風急防敵冲縱火燒營 暴

風卒起昏塵蔽天曰冥報風急兵卒至謹防冲襲 雲霧
隨風亂掩入營曰引兵風宜備驍勇護其入處 暴風入
營吹倒軍帳曰惡信風兵士謀叛急宜犒賞 風勢温熱
曰禍風賦歛無度民怨盜興 風温不常蝗蟲暴生曰惑
風君淫政慢國有變亂 風不時常發於東北艮方其勢
淒涼為水恒陰 風不時常起於西南坤方其勢暄燠為
旱恒暘 風暴起聲若破鼓有兵必敗 天氣常風君不
思善怨生亂作 大風暴起令急刑濫 旋風數日不止
兵起屠城 大風拔木火災兵起 風起日下有雲烏潤
吉蒼白為水為兵赤黃為旱 風起月下有雲烏潤凶赤
白為旱為水災為兵喪

凡出軍之日暴風折旗幟大雨不止此天怒也必待晴後擇日進兵 兵大舉出城逆風來卽結營住守候過後啓行更審彼方假令三冬敵在乾而狂風從西北來則不可攻八方之風準此 兵行之次風卒來突迫軍中人馬辟易前有神廟祭之則吉 凡出軍風雲不興水草不動有風驟來牙旗折旛繞竿或不垂者交戰凶 凡行軍道逢急風甚雨沾濕人馬行步不利出軍 初出軍旋風旁起至前軍飄轉引道者軍必大勝 軍行回風相觸者中道必還戰亦無功 凡軍行有八難風生必須迴避敵來接戰必敗八難風者遍歷八方回轉不定拔木摧屋吹塵蔽天望在敵上急攻之勝在我軍嚴備勿戰行道逢之宜結

營寨令弱兵退守輜重奇兵強弩分據要害猛將銳卒陳於軍前防其冲突擊其惰歸 初出軍人聲怯馬不嘶或從旁從後風起吹沙觸塵人馬行過無跡名鬼風軍必敗 軍出之頃有風而草木不動者賊不可得 軍行有風驟來吹捲牙旗旛或繞竿者此爲天不順上將死 軍行旗旛指後三軍戰敗將亾若半途逢賊分軍兩向或戰或住逆風來攻旗旛脚不進者凶敗之兆 凡入敵境三日內有風雨雷霆從我軍上發入彼軍戰大勝 凡軍入敵境未遇戰忽有急風來射我軍有雲乍東乍西迅速走者急收兵設備 行軍屯營風動旗旛不動如無風然遇敵不交戰而罷兵 若入敵境經要害駐城壘三日內有風

雨雷霆從我軍上往彼去有怒威之氣此天助必剋城獲勝 軍在敵境下營纔定未逢戰盡夜有急風來射我軍雲勢奔速乍東乍西急防賊兵逼我營寨 下營畢而風聲卒如雷鳴吹倒旗鎗須防敵至大戰流血若大風聲如雷吼三朝五日者占同 兩軍相近各有營寨相守未經勝負當察風勢如風勢遲緩而漸暴急者宜秣馬誓眾設備防賊至必有大戰風從破軍方或賊方上來初起則塵土蓬勃及至我軍上低小蕭索不緊者十里外兵不交鋒名無戰風 營陣旣列旗鼓初張暴風卒掩軍幕旗旛摧折者此爲惡兆主將失位軍人叛散 風急纔住而敵人來者我軍必敗 臨陣風從後來戰大勝 凡軍行風從

後吹來及鴉在後順風叫來戰大勝 風從賊陣吹來鬪則大凶急收兵回營 若交戰風雨驟來者此名落尸戰大敗 凡風夜動晝止賊必夜來攻 風猛烈如雷者折木發屋飛沙走石急宜備之 風猛烈如箭急過無踪名曰飄風當速避之 四季內忽猛風揭瓦揚沙所來之方必有精兵急宜備之 若天氣昏沉風勢錯亂密雲不雨爲下謀上 風雲相交必見陣審其慢急隨人大吉 軍營內忽有旋風吹偃旗鎗并撼帳幄者必有奸謀 旋風吹物上天人皆恐怖我軍有人與賊陰謀宜撫將佐犒士卒則禍去矣 若與賊相近旋風歷歷至隨其所至設兵備之或雲氣從外入敵城從入處攻之必克 旋風入寨

亦為狂賊急宜嚴備 旋風入敵城從所入攻之破 風
飄書物入營寨勿收取宜祭土地吉 風飄物入營得敵
土地大勝 營寨上有旋風歷過者隨所歷處將有寇至
急宜備之 旋風入營寨揚土發屋倒戈折竿急宜設備
旋風在城營中吹物騰飛上空不宜固守 旋風飄衣
騰起空中墜於營宅外有賊殺至平時大禍不出一年
春甲子風主頒赦夏丙子風旱災兵荒秋庚子風刑濫兵
起冬壬子風水災國憂四季戊子風歲收君吉頒赦
甲日大風丙丁必雨不雨海中兵起乙日大風粟貴夷狄
兵起丙日大風有猝兵來圍急丁日大風傷物人畜疾疫
為旱戊巳日大風糴貴土功興或遷邑庚辛日大風蟲生

人病急備邊陸壬癸日大風北虜侵邊

子日大風日光沉沉兵起水中丑日大風掃地揚沙粟暴
貴寅日大風赤雲四塞火災卯日大風黃塵衝天蝗大生
辰日大風民入堡居集大將出行巳日大風蓬勃大旱午
日大風乍疾乍遲人民流散邊防事急未日大風日無光
影土功大興申日風聲如磬穀貴盜起酉日大風蕭蕭濡
潤大雨水災戌日大風塵霧橫天揚埃千里胡兵四起亥
日大風揚沙折木兵亂相攻九風三日後有雨即解
甲乙日行軍西風損將東風勝一云東風西風俱不勝北
風平和南風從後來大勝丙丁日北風損將南風勝一云
東風大勝西風北風賊勝南風平和對面風來凶戊巳日

南風大勝東風損將一云東風不勝西風北風大勝南風
小勝庚辛日南風損將西風勝一云東風西風俱大勝北
風平和南風從西伐東勝壬癸日風從北來利從南來勝
四墓風來必敗一云東風北風平和西風南風大勝凡風
從後來勝從前逆來凶 又曰甲乙日東風損中軍南風
有病西風損將北風險宜伏兵勝丙丁日東風損將南風
損將軍伏兵吉西風平和北風勝戊己日東風前有兵大
戰南風損將西風伏兵吉北風損軍庚辛日東風有伏兵
南風軍疾西風主憂北風損軍壬癸日東風敗南風損軍
西風伏兵吉北風大敗

十二支歲月日時占

太歲在寅正月寅日寅時風從寅

上來暴急寒慘者客勝餘竝同

刑占 丑日戌時風從未上來寒慘者大戰流血主客俱
傷丑刑戌刑未未又刑丑故云申日寅時風從巳上來
占同子日卯時風從子上來客大勝風從卯上來主人勝
辰午酉亥風從其上來者主人勝凡風從刑上來相沖擊
者前路有賊兵突至凡風逆刑我者伏兵卒起軍中凡風
從刑上來坐者急起行者急走賊必至戰必敗移營設備
誓眾固守慎保無虞凡占月刑不出月日刑不出日風從
刑來非惟兵爭凡事皆凶刑上發疾刑下發遲假令子日
刑卯風從子來刑卯為刑下從卯來刑子為刑上其餘倣
此

凡刑金爲兵金日庚申辛酉是也刑木爲喪木日甲寅乙卯是也刑火爲火日丙午丁巳是也刑水爲水日壬子癸亥是也刑土爲土日戊辰戊戌巳丑巳未是也
凡軍行逢歲月日時刑上風來必有將死若得王相客死
死囚休廢主人死風從歲刑上來大軍人馬多死不出一
歲天下兵起一云不出三日邑中大兵起風從月刑上來
郡邑賊起風從日刑上來即日近境兵起主人敗散風從
刑冲上來不動枝葉者無傷凡有災變必有怒聲寒慘如
在軍將軍死 兩軍相當暴風忽從三刑五墓上來塵昏
殺天鮮葉茂條皆落乍起乍止者前後防有伏兵掩我無
備若天色清明風不寒慘者不成 兩軍相當風從歲月

日時上來勢大而遲緩者准備攻戰大勝若風勢急速乍
起乍止者有狂賊至小戰以日納音與風起時方占其勝
負 旋風起三刑五墓上來者有伏兵勿戰戰必敗 凡
軍行有大風從三刑五墓上來不可戰宜避之 凡年月
日時四殺五墓風從其上來白濁昏寒皆爲凶兆其日三
刑最急坐不及起有賊暴至若行即防伏兵平時無兵防
人謀害 敵城相近攻擊未克風勢從克上來射我軍經
日不絕止而復起數日如此者賊有伏兵欲來襲我或賊
救兵至宜整備待之當得賊城

八風 北方廣莫風至冬至後四十五日四時暴風起北
方至盜賊起天下兵動坎爲水至盜賊 東北方條風至

立春後四十五日四時暴風起東北方艮爲鬼門鬼行人道多旱疫 東方明庶風主春分後四十五日四時暴風起東方人流盜興旱蝗歲饑震爲木木精曰歲星主稼穡東南方清明風主立夏後四十五日四時暴風起東南方人多病洩利巽爲風風者百病之長 南方景風主夏至後四十五日四時暴風起南方有火災來年旱離爲火也 西南方涼風主立秋後四十五日四時暴風起西南方天下有兵坤爲土爲民爲衆土動衆亂也 西方閭闔風主秋分後四十五日四時暴風起西方主秋旱早霜天下兵動兌爲金金精曰太白太白主兵 西北方不周風主立冬後四十五日四時暴風起西北方有盜賊相攻劫

歲饑人流凶乾爲金爲寒金主殺伐寒則傷物 右八方暴風但風起其方卽依上占京房曰八方風候及八卦風氣春白夏黑秋赤冬黃皆爲下逆上兵革動各隨其部日辰占之凡八風折木發屋飛沙走石三日不雨則占風爲陽雨爲陰陽得陰則解故怒風得雨而息亢極受制惡以善成

春孟條風仲明庶風季清明風和順時寒主水熱傷禾民疫 夏至景風和順時寒兵興水災人疫 秋孟涼風仲閭闔風季不周風涼吉熱未歲災旱疫寒兵起人疾 冬至廣莫風寒歲豐煖水起人災萬物不成 凡兩軍相當先分八卦以察主客勝負若風從西北乾上

或正北坎上東北艮上皆為利客宜先舉若從正東震上東南巽上正南離上皆為利主宜後舉若從西南坤上起主客俱不利若從正西兌上來客有伏兵主人宜設備不則敗若從乾上客舉兵必獲糧

八風不作陣勢氣味不甚掀大五風間或有八風時常有乾風悠悠揚揚不疾不徐巽風平蕩悠長順吹不歇兌風細細襲人條理不亂坎風尖削險怪撮聚成旋離風明爽和緩若斷若續艮風剛大激烈吹物上冲震風冲大渙散頓而復起坤風長大包含遍野散漫

乾風來乾巽方國政理離方火焚宮坤方兵眾求糧賞兌風來離方宮中火坎方內侍陰謀坤方外夷重譯離

風來乾方胡兵犯闕離方火焚宮震方歲旱火災坎方奸

邪陰謀 震風來乾震方嗣君登位坤艮離方王道興天

下平 巽風來兌方蝗生穀傷離方火焚內宮震方蠻夷

猾夏 坎風來乾方民求賑濟兌方姦宄成風離方民災

兵起震方謀立王侯巽方歲豐坎方陰謀於上艮方兵亂

坤方盜賊起亂 艮風來乾方外夷入貢兌方外國求婚

離方旱災巽方百穀不成坎方水旱相仍坤艮方旱荒米

貴 坤風來離方大旱坎方后宮陰謀艮方內亂凡八卦

之日風從八卦而來吉遇此日行軍決勝 乾上有風吹

倒旗幡此天怒不可攻 艮上有風帶黃黑色作鍾鳴者

比夜有賊劫營損兵 震上有風清涼無塵吹麾蓋簷捲

者城內有賢士不可攻 巽上有微風吹林梢自嚮者名
叫噪風城內有靈神助不可攻

寅日風從艮震上來大勝巽上來軍自亂離上來次日後
軍大亂坤上來不宜戰兌上來次日降賊兵乾上來急戰
大破賊兵坎上來小戰 卯日風從艮震上來不利離上
來戰獲將坤兌乾坎上來勝 辰日風從乾坎艮上來必
勝兌上來賊降 巳日風從乾上來不宜戰失將坎上來
有亂謀艮上來賊兵千里震上來大戰巽上來半勝離上
來大勝破國坤上來急備賊兵入寨兌上來有戰 午日
風從乾上來小勝坎上來收賊兵艮上來大亂震上來有
大將加官巽上來大勝離上來百里有客兵來降坤上來

獲軍糧草兌上來萬里遠征 未日風從震上來不宜戰
兌上來主血光 申日風從乾坎上來大勝艮上來主勝
一云夜半有賊兵劫寨震巽上來大亂遇回兵即吉離上
來有伏兵一云小勝坤上來凶兌上來大軍絕糧 酉日
風從乾上來絕糧艮上來主勝離上來六十里有伏兵坤
上來百日内有兵圍城兌上來主敗客勝 戌日風從乾
巽上來大勝兌上來急備奸人入寨 亥子日風從八方
來大吉 丑日風從乾上來不利坎上來說得彼太平艮
上來宜退巽離上來大勝坤上來自伏兌上來主血光不
利

三辰八角風例 申子辰日艮辱震殺巽反離吉坤抵兌

誕乾分坎爭巳酉丑日巽辱離殺坤反兌吉乾抵坎誕艮
分震爭寅午戌日坤辱兌殺乾反坎吉艮抵震誕巽分離
爭亥卯未日乾辱坎殺艮反震吉巽抵離誕坤分兌爭
凡風從辱上來有耻辱事從殺上來有篡逆叛殺事行道
逢之有相知人來遇致遭傷損從反上來有反逆不平之
事從吉上來有喜慶事行道逢之有賢人君子相見有宴
會從抵上來有非禮抵觸事王相貴人相冲休廢庶人囚
死罪人相連從誕上來有妄誕之人相欺詒從分上來有
非理分辯之事從爭上來有奸人來爭財物及格鬪等事
宮宅之中回風亦占

八逆風

立夏巽王風從乾上為一逆小凶立春艮王風

從坤來為二逆立秋坤王風從艮來為三逆穀不實立冬
乾王風從巽來為四逆人逃秋分兌王風從震來為五逆
帶刀入市冬至坎王風從離來為六逆人民潰散夏至離
王風從坎來為七逆臣下為亂春分震王風從兌來為八
逆殿上有刺客巳上八逆風若帶刑殺昏黑寒慘日色白
濁者大凶 立春艮王震相巽胎離沒坤死兌囚乾休坎
廢春分震王巽相離胎坤沒兌死乾囚坎休艮廢八節竝
依此次第推之

凡占風以方位為主風為客 離方宮風防失土地震巽
方宮風必獲土地坤艮方商風防失輜重離方商風得敵
輜重坎方角風防截糧水乾兌方角風可截糧道震巽方

徵風防火燒營坎方徵風可焚敵營乾兌方羽風防失賞
賜坤方羽風可灌敵水此以我生我克為占方位為我
宮風來乾兌方可復中土來坎方敵毒其水商風來坎方
可得兵助來震巽方敵截糧道角風來離方防敵火攻來
坤艮方可分敵土徵風來坤艮方防敵火攻來乾兌方敵
生我克我為占 亥子日時震巽方風我勝得糧離方風
防敵灌水寅卯日時離方風我宜火戰坤方風防失土地
巳午日時坤艮方風我勝得地乾兌方風防失輜重申酉
日時坎方風我勝截水震巽方風防截糧水辰戌丑未日
時乾兌方風可奪輜重坎方風防敵毒水此以日時生克
方位為占 亥子日時角風敵兵得助徵風可截敵糧寅
卯日時徵風防敵火攻宮風可分敵土巳午日時宮風火
攻分土商風可奪輜重申酉日時羽風防敵毒水角風可
截敵糧辰戌丑未日時商風防奪輜重羽風可截敵水此
以日時生克風音為占

戎事類占卷之十五終

戎事類占卷之十六

豫章李克家嗣宗甫輯

古歙胡文海鵬運甫校

風類二

凡五方之風以納音為論若風發屋折木揚沙走石至三日以上乃占不然雖凶亦無大害兩軍相遇以其日納音為客時與來方為主時方制音利為主後應納音制時宜為客先舉若相生為和睦

支辰五音 子為陽宮土主帝王丑為陽徵火主旱主火

災宮寺口舌寅為陽徵火主旱主火災烽燧卯為陽羽水

主雨主水主霧辰為陽商金主大將主吏士巳為陽角木

主疾病憂患午為陰宮土主后妃未為陰徵火主旱主度
人土功蜚蟲詔赦書數申為陰徵火主蝗疫酉為陰羽水
主雪霜水電戌為陰商金主小將主兵刃亥為陰角木主
死喪哭泣自子至巳皆為陰律所生故為陽自午至亥皆
為陽律所生故為陰

納音五音 甲子壬申甲午庚辰壬寅庚戌為陽商乙丑
癸酉辛亥乙未辛巳癸卯為陰商丙寅戊子甲辰甲戌丙
申戊午為陽徵丁卯巳丑乙巳乙亥丁酉巳未為陰徵戊
辰庚寅壬午壬子戊戌庚申為陽角巳巳辛卯癸未癸丑
巳亥辛酉為陰角庚午丙戌戊申戊寅庚子丙辰為陽宮
辛未丁亥巳卯巳酉辛丑丁巳為陰宮甲申壬辰丙午甲

寅丙子壬戌為陽羽乙酉癸巳丁未丁丑乙卯癸亥為陰
羽凡受宮商角徵羽皆倣此

大風噴薄如吹火其聲中宮宮屬土聲怒土木工興如吹
火主兵火也聲平國君生子 風聲清切如裂帛其聲中
商商屬金聲怒征伐兵起聲平歲疫人死 大風嗚咽高
下不齊其聲中角角屬木聲怒兵戈起風急而寒大兵風
和而平肆赦 風烘烘然如炎火其聲中徵徵屬火聲怒
兵火災 風激揚如湍流其聲中羽羽屬水聲怒奸邪暗
起有水災

宮風大則聲隆隆如洪鍾小則如牛鳴窖中作溲酸濁徽
氣 商風大則聲鏘鏘如環珮小則如離羣羊作銅辛血

腥氣 角風大則聲號號如震落小則如雞登木作烟焦
燒髮氣 徵風大則聲烈烈如燎火小則如鷹喚子作疏
黃火藥氣 羽風大則聲澎澎如湧浪小則如蛙鳴渚作
水腥魚腥氣

風勢殷殷如車如雷如擊鼓聲者為宮其將寬和 風聲
如金石如雜佩如鸞和者為商其將威猛而好殺 風勢
舒徐動林木者為角其將仁恕不可詐欺 風勢如流波
相激者為羽其將貪暴多奸詐 風勢如奔馬如炎火者
為徵其將猛烈難與爭鋒

風宮音如牛鳴窖中急惡土功大興其風由宮方生山摧
岸崩角方蝗蟲敗穀商方大水徵方虎狼為害羽方大雨

陰寒

商音如離羣羊其風由商方起有鬪兵羽方夷塞

關梁宮方后憂角方國有兵徵方君令急行兵凶 角音

如千人呼嘯拔木則賊來戰其風起角方急兵入郭商方

君令急暴兵起宮方土功作羽方人災其野饑徵方火災

徵音如縛彘聲嘶發屋有急事來其風自徵方生火災

角方旱災土功興宮方火災人哭泣商方急兵鬪羽方寶

物出國 羽音如揚水如擊濕鼓怒則糴貴兵發其風從

羽方來霜雹大雨商方兵鬪將憂宮方暴寒傷物徵方臣

民有憂角方城圍不解

四季受宮之日風從四季上來飛土揚塵發屋折木而天
色溫和時加子午及子午上止者當有邊夷入貢寒尅則

不至受商受宮之日風從四季上來其勢叫怒時當子午
兼帶刑殺或申子亥卯上來其勢急速者當有夷兵犯塞
風勢寒剋必成 四季受角之日時加子午風勢緊急從
四季上來中國將伐四夷風止之處為所伐之地止辰伐
東夷止未伐南夷止戌伐西夷止丑伐北夷若風止有雨
景色溫和即不行 受角之日大風發屋折木從丑寅未
申徵方上來乍遲乍疾時加子午雷火災發 受羽之日
風從卯酉上來天陰雨潤人心悲慘連三日者當有暴雨
大水驟至又有風雨蕭蕭潤氣勃勃從卯酉上來必然連
雨水溢

宮日風從子午宮來動宮主出行急風急出有惡令慢風

慢出有喜令以日子占遠近 宮日風從陽宮來山崩君
出地動有土功旱災風從陰宮來為地震裂若后有行又
為旱 宮日風從子午宮來時加子午為重宮君欲行大
臣走風雨不調 宮日風從丑未寅申徵來為宮動徵有
火災有土功寶物出有兵時加徵為重徵有義兵行有詔
令謂之義風 宮日風從卯酉羽來為宮動羽且有大雨
不則大臣出走若復為旱宮君羽臣怒故臣走宮土羽水
土盛水衰則火起故復為旱 宮日風從辰戌商來為宮
動商有兵行且有客兵來時加辰戌為重商有兵殃 宮
日風從巳亥角來為宮動角有兵戰主人憂客兵傷從陽
角來邊兵戰 宮日大風從乾上來有暴雨湧水若風不

揚塵氣色和暢日光明盛不寒慘者國有喜良來爲凶喪
臣子妻屬死囚休廢爲下賤良爲鬼門死之兆以風止
之方決其所在角雜羽爲水死雜徵爲燒死雜商爲兵死
雜宮囚死純角病死大風止日時方位徵多爲火羽多爲
水商多爲兵爲粟貴角多爲疾疫宮多爲吉 宮日風從
徵羽來民不安角徵來火起角來疾疫宮羽商來糴貴羽
來水澇 徵日時加徵怒風蓬勃從商上來天色黃黑疾
作火燒倉庫止於商徵者事疾 徵日時加羽風蓬勃從
徵角商上來天色昏冥爲火燒市肆 徵日風蓬勃從羽
上來先陰寒後熱火燒人 羽日時加宮風起羽有疾疫
以風止處爲災發之期寅則正月是也 羽日風從商角

上來時加徵者月內米貴人不安 商日風從角上來時
加商角米貴人疫 商日風從徵商角來粟貴人疫 角
日風從角徵上來火災粟貴或時加角徵或從他處起而
止於角徵皆爲火災 羽日怒風從商上起揚沙晝晦有
兵來攻城邑若日中夜半時至客必敗商金羽水母子兼
強而水喪於土勢不能行金懷母義難保其子故城可固
守蓋日中夜半子午宮土時也

若鳴條以上怒風起止皆以五音五行相尅言吉凶其下
主客之法即日辰所得納音五行是客時下十二辰與風
所來方爲主則可見勝負矣假令甲子納音屬金是商又
加巳亥上角木 來是金尅木乃客凌主主必敗若得

丑未寅申風王勝客敗 凡初出軍日風從亥上來冲霧捲雲人強馬壯鼓角聲清音震必獲全功若從傍而來前軍必得天助獲敵糧有降我者 若軍行風從五音相生上來風氣調暢勝捷成功假令巳亥角風從卯酉羽上來此是母來翊子或從丑未寅申上來此是子來投母出軍多勝 凡中國欲伐夷狄當視四季受角之日日中夜半風勢緊急從四季上來當於風所指處伐之戌辰戌戌癸丑癸未受角日也辰戌丑未為四夷角木尅制四季土故爾 若四季受宮之日風從卯酉羽上來皆戰賊兵解散 丙辰丙戌辛丑辛未受宮日也尅所不勝故戰而散 東方寅卯之角國有大寇人多疾病庚寅辛卯是也 寅

卯之徵有妖言惑眾鬼神作祟又為火災丙寅丁卯是也

寅卯之商大兵攻伐出燕趙壬寅癸卯是也 寅卯之

羽有霜雹水災蝗蟲起甲寅乙卯是也 寅卯之宮帝不

安其都有游幸出喜令以財物賜庶人戊寅巳卯是也

南方巳午之徵夷狄侵害遠人邪謀乙巳戊午是也 巳

午之羽有江海賊或水中船害人癸巳丙午是也 巳午

之商大臣用事人民作亂辛巳甲午是也 巳午之角牛

羊疫魚死水中民少移動巳巳壬午是也 巳午之宮天

子欲警暴亂賞有功逐佞人封有德丁巳庚午是也

西方申酉之商軍民內移舟行沒溺壬申癸酉是也 申

酉之角人民災奸兵起庚申辛酉是也 申酉之宮臣爭

財賂不恤國事戊申巳酉是也 申酉之徵內臣謀逆丙申丁酉是也 申酉之羽霜雹非時秋水災兵動水賊起民疾病五穀不熟甲申乙酉是也

北方亥子之羽蝗蟲卒起霧傷萬物癸亥丙子是也 亥子之商外兵爲惡水中賊起辛亥甲子是也 亥子之角公卿憂喪巳亥壬子是也 亥子之宮土功興兵起丁亥庚子是也 亥子之徵皇后憂太子薨乙亥戊子是也 四季辰戌丑未之宮有土功人流移牛羊疫丙辰丙戌辛未辛丑是也 辰戌丑未之徵山賊流言民人驚怖逃亾甲辰甲戌巳丑巳未是也 辰戌丑未之羽妖言流播衆庶移徙壬辰壬戌丁丑丁未是也 辰戌丑未之商五穀

不熟民多災歿庚辰庚戌乙丑乙未是也 辰戌丑未之角夷兵起人作難寶物出戌辰戌戌癸丑癸未是也

六情干屬

一曰本情甲乙主之二曰合情丙丁主之三

曰刑情戊巳主之四曰衝情庚辛主之五曰鈞情壬癸主

之本情用本日支辰合情用本日支辰所合刑情用本日

支辰所刑衝情用本日支辰所衝鈞情陽日用本日支後

第三辰陰日用本日支前第三辰 本情甲子陽商貪狼

乙丑陰商公正甲申陽羽貪狼乙酉陰羽寬大口陽徵

奸邪乙巳陰徵寬大甲戌陽徵公正乙亥陰徵陰賊甲午

陽商廉貞乙未陰商奸邪甲寅陽羽廉貞乙卯陰羽陰賊

合情丙寅陽徵陰賊丁卯陰徵公正丙子陽羽公正丁

丑陰羽貪狼丙戌陽宮陰賊丁亥陰宮廉貞丙申陽徵寬
 大丁酉陰徵奸邪丙午陽羽奸邪丁未陰羽廉貞丙辰陽
 宮寬大丁巳陰宮貪狼 刑情戊辰陽角奸邪巳巳陰角
 貪狼戊寅陽宮寬大巳卯陰宮貪狼戊子陽徵陰賊巳丑
 陽徵公正戊戌陽角奸邪巳亥陰角陰賊戊申陽宮廉貞
 巳酉陰宮寬大戊午陽徵廉貞巳未陰徵公正 衝情庚
 午陽宮貪狼辛未陰宮公正庚辰陽商公正辛巳陰商陰
 賊庚寅陽角貪狼辛卯陰角寬大庚子陽宮廉貞辛丑陰
 宮奸邪庚戌陽商奸邪辛亥陰商寬大庚申陽角廉貞辛
 酉陰角陰賊 鈞情壬申陽商寬大癸酉陰商貪狼壬午
 陽角陰賊癸未陰角公正壬辰陽羽公正癸巳陰羽貪狼

壬寅陽商陰賊癸卯陰商廉貞壬子陽角寬大癸丑陰角
 奸邪壬戌陽羽奸邪癸亥陰羽廉貞 凡言六情日依此
 時此方止用支辰以本情占之

六情支屬 一曰貪狼申子主之二曰廉貞寅午主之三
 曰陰賊亥卯主之四曰奸邪辰未主之五曰寬大巳酉主
 之六曰公正丑戌主之

六情風鳥所起 巳酉寬大之日時加巳酉鳥鳴其上王

相當言長吏休廢囚死當日酒食時加寅午亦辭讓

事時加丑戌有酒食口舌訟事時加申子有酒食爭財事

申子貪狼之日時加申子鳥鳴其上王相當言羣賊攻

劫休廢囚死有竊盜事時加寅午有善人說攻劫事時加

巳酉有酒食言攻劫事時加丑戌有盜賊詞訟或文書追盜賊事時加亥卯王相則有羣賊攻劫休死小盜時加辰未有婦人說盜賊事 寅午廉貞之日時加寅午鳥鳴其上王相當言長吏休廢囚死為僕役有諫諍 巳酉有遠書至時加申子有酒食爭財物事時加辰未有陰私口舌時加丑戌有酒食時加亥卯有酒食起爭殺 丑戌公正之日時加丑戌鳥鳴其上王相有長吏政理之事休囚有吏來慰問時加巳酉有宴饗賜與時加寅午有辭讓慶賀時加辰未有吏來說陰私盜賊事時加申子有吏來說財賦欺詐事時加亥卯有吏來說盜賊相殺傷事 亥卯陰賊之日時加亥卯鳥鳴其上王相羣賊大戰囚死有

爭鬪殺傷時加丑戌有吏逐賊相害時加寅午有婦女鬪傷事時加辰未有好事鬪傷時加申子有兩賊自相攻劫 辰未奸邪之日時加辰未鳥鳴其上王相有長吏來言捕獲事囚死有口舌事時加寅午有恭謙人言奸淫事時加申子有陰謀爭鬪劫盜事時加亥卯有賊兵相害事 右六情之日鳥鳴及風起於本情方上則課其時依上占之 凡陰賊之日有飄風從四季辰戌丑未上來時加四季或羣鳥飛從四季上來時加四季皆為有口舌索之事若值休囚廢死即在近道假令風起其方若羣鳥疾飛從其方來即時搜索欲知所捕何事時加丑戌則是仇怨 辰未則是盜賊或殺人賊亥卯王相是大賊 凡寅午廉

貞巳酉寬大丑戌公正日風和暖日清明皆吉主恩命慶
 賀申子貪狼亥卯陰賊辰未奸邪日風寒慘日昏濁皆凶
 主陰謀賊害看王相休囚准備無失 凡奸邪受宮之日
 怒風從宮上來止於四季風氣寒慘城中兵 以殺長
 吏四出不禁期七十日遠九十日奸邪受宮丙辰辛未日
 也辰未奸邪納音宮土子午宮方風來止於辰戌丑未上
 為四季也凡受商受角受徵受羽皆為納音竝倣此 凡
 日中夜半風從申子亥卯上來夜發晝止日中大寒不解
 敵必夜來攻城劫寨蓋申子貪狼亥卯陰賊子午宮土城
 寨之象 夜半有怒風乍起從四季上來而止於四季者
 中國欲伐夷狄所以然者中國中土夷狄邊土夜半夜之

中也子為宮土中國主之四季土居四隅夷狄主之 凡
 旋風卒起宮宅內或從外入飄揚衣服發屋墮瓦必有暴
 卒橫事若從歲月日時德上來或止於德方德合之方值
 德合及寬大之日其辰王相則有吉事乍至若從歲月日
 時刑冲墓殺上來或止刑冲墓殺方或日辰囚死皆為凶
 事貪狼陰賊奸邪日辰大凶軍必移營戰必退守行者急
 走坐者急起避之 旋風起席間平時失官有軍戰敗
 行軍忽旋風從前來逆冲防有伏兵潛謀等 以風忽
 從後來逐人清明吉寒濁凶 旋風忽從傍起或橫冲當
 面截過皆凶竝用日辰支干納音加時刑德六情五音占
 之行道有旋風四面圍迫宜迴避設備官防夜來劫營

商防賊兵掩至角防林麓埋伏徵防火災羽防雨水暴溢
角日旋風突起從角來其地有凶喪事 羽日旋風突
起戒行舟防沒溺 凡在宮宅營帳中有旋風徐徐繚繞
清明和暢漸向前來有賢人君子至或為使公之事
凡行道暴起旋風突從廉貞寬大公正上來與本命行
年相生則為喜事相迎從奸邪陰賊上來與本命行年相
尅防賊兵衝殺陰謀傷害若蓬勃寒慘又加刑殺大禍即
至本命即所生太歲支辰是也行年即男從一歲起丙寅
輪推之如十一歲數至戊寅二十一歲數至庚寅一歲移
一辰挨去是也

觀風占賊數視所從來之方為月期所發時辰為道里人
數乘王氣十倍五倍休廢如數凶死刑冲減半假令風從
坎上來起夜半止日中坎居子位期十一月夜半子時子
數九在九里或九十里若九人或九十人九百人之數如
月日時方于支竝王當為千萬人數甲巳子午九乙庚丑
未八丙辛寅申七丁壬卯酉六戊癸辰戌五巳亥四
凡壬辰主東夷其日風從辰上起七日東方海賊動期四
十日 癸未主南夷其日風從未上起七日南夷內侵期
七十日 壬戌主西夷其日風從戌上起七 西羌
反期五十日 癸丑主北夷其日風從丑上走若七日九
日匈奴大舉入寇八日以上風叫怒者凶 凡壬辰壬戌
日有風從子上來三日以上昏慘暴急此水內大賊欲攻

王國凡風大寒冽透骨不解皆為賊發 壬戌癸亥乙卯
壬辰甲申丁未六日有風從申子亥卯上來水中兵起相
殺近期五日遠五十日以上六日皆受羽申二 貧狼亥卯
陰賊故也 諸羽日大風昏霧夜從申子上 迅急
當雨不雨水賊攻絕津梁道路不通近期五日遠五十日
丙辰辛未丙戌辛丑四季受宮日風從四季上來折木
揚沙五日以上至九日止子午上此為夷狄君長來朝或
遠夷入貢近期五十日百日遠百五十日 壬辰癸未壬
戌癸丑四季之日有風從申子亥卯上來迅急寒慘連三
日至七日此邊界長吏聚眾結連夷狄內侵郡國晝伏夜
來猝起作逆期七日或七十日凡風從貧狼陰賊奸邪上

來蓬勃陰慘夷狄反叛 庚辰乙未庚戌乙丑四季受商
之日時又加商風從亥卯辰未上來止於子午五日至九
日勃怒不解夷狄起兵若風生中止或更轉巳酉寬大上
來賊必自退近期七日遠七十日或百日若風雖急暴不
昏慘殺日止於子午或從子午上來或時加子午散氣霑
濡若雨濕然皆賊兵中道解散之兆 四季受商日怒風
從四季上來外夷欲屯聚寇掠不出七十日若從四季上
來初不殺日復從四仲子午卯酉上來時加 又從
陰賊方來寒慘迅急日無光者夷狄兵起中道自相殘殺
不至近九日十日遠二十日 奸邪公正受商之日大風
暴怒從奸邪公正上來為夷兵犯塞十日不止千里來二

十日不止二千里來期七十日辰未如邪丑戌公正四季日也故云 諸四季日暴風卒起及游風半日湏臾止者為千里外兵來不則近界羌戎為變風小事六風大事大凡大風從四季上來止於子午氣象清明 暖為四方邊界欲來歸順隨日期占之 凡四季主關津道路主管籥主遠方賓客占外國外夷州界 凡受羽日風從卯酉上來陰濁寒慘連三日者必有暴風雨大水驟至若風來帶刑殺及起於貪狼奸邪陰賊日時則有水中賊起 諸亥卯受角之日怒風從丑未上來時加申子賊用火攻若時加廉貞公正此仇怨相殺不出三日六日以日占其地蓋亥卯木所生王者也角屬木丑未徵火木因火發

也申子貪狼禍心生也廉貞公正本於陰賊怨所起也故云 諸徵日時加徵暴風卒起天色清明有檄書至為火災事近期三日遠三十日以日占其國 凡占火得巳酉時誤相殺也得丑戌時仇怨相殺也若徵風三日以上天色赤黃至七日不解天災火起千里相望有大風即解 歲月日時方德刑墓殺例 于德甲丙戊庚壬為陽陽德自處甲德在甲丙德在丙戊德在戊庚德在庚壬德在壬乙丁巳辛癸為陰陰德在陽乙德在庚丁德 德在甲辛德在丙癸德在戊戌分寄於奎壁巳分於艮軫天門地戶之位也 支德歲月日時子德在巳丑德在午寅德在未卯德在申辰德在酉巳德在戌午德在亥未德在戌

子申德在丑酉德在寅戌德在卯亥德在辰以次順後五
辰是也 月干德寅午戌月德在丙亥卯未月德在甲申
子辰月德在壬巳酉丑月德在庚 三合申辰亥卯
未合寅午戌合巳酉丑合 干德合甲與巳 辰合
丙與辛合丁與壬合戊與癸合 四殺者劫殺災殺歲殺
戊巳殺是也假令申子辰年月日時劫殺在巳災殺在午
歲殺在未巳酉丑年月日時劫殺在寅災殺在卯歲殺在
辰寅午戌年月日時劫殺在亥災殺在子歲殺在丑亥卯
未年月日時劫殺在申災殺在酉歲殺在戌戌巳殺者流
戊就巳坎離成象變動不居所謂都天殺者是也假如甲
巳之年殺在辰巳乙庚之年殺在寅卯丙辛之年殺在戌

亥丁壬之年殺在申酉戊癸之年殺在午未其法每年但
尋月建天干值戊巳者是也 五墓者歲月日時干支木
火土金水所墓之方也

戎事類占卷之十六終

